0.0.1 kammasuttam

- 1. navapurāṇāni bhikkhave, kammāni desissāmi, kammanirodhañca, kammanirodhagāminiñca paṭipadaṃ. taṃ suṇātha, sādhukaṃ manasikarotha, bhāsissāmīti.
- 2. katamañca bhikkhave purāṇaṃ kammaṃ? cakkhuṃ bhikkhave purāṇaṃ kammaṃ abhisaṅkhataṃ abhisañcetayitaṃ vedanīyaṃ daṭṭhabbaṃ. sotaṃ purāṇaṃ kammaṃ abhisaṅkhataṃ abhisañcetayitaṃ vedanīyaṃ daṭṭhabbaṃ. ghānaṃ purāṇaṃ kammaṃ abhisaṅkhataṃ abhisañcetayitaṃ vedanīyaṃ daṭṭhabbaṃ. jivhā purāṇaṃ kammaṃ abhisaṅkhatā abhisañcetayitaṃ vedanīyaṃ daṭṭhabbā. kāyo purāṇaṃ kammaṃ abhisaṅkhato abhisañcetayitaṃ vedanīyaṃ daṭṭhabbo. mano purāṇaṃ kammaṃ abhisaṅkhato abhisañcetayitaṃ vedanīyaṃ daṭṭhabbo. idaṃ vuccati bhikkhave, purāṇaṃ kammaṃ.
- 3. katamañca bhikkhave navam kammam? yam kho bhikkhave etarahi kammam karoti kāyena vācāya manasā. idam vuccati bhikkhave navam kammam.
- **4.** katamo ca bhikkhave kammanirodho? yo kho bhikkhave kāyakammavacīkammamanokammassa¹ nirodhā vimuttim phusati. ayam vuccati bhikkhave, kammanirodho.

¹kāyakammam vācākammam manokammam - sīmu, sī.

- 5. katamā ca bhikkhave kammanirodhagāminī paţipadā: ayameva ariyo aţţhaṅgiko maggo. seyyathīdaṃ: sammādiţţhi sammāsaṅkappo sammāvācā sammākammānto sammājīvo sammāvāyāmo sammāsati sammāsamādhi. ayaṃ vuccati bhikkhave kammanirodhagāminī paṭipadā.
- 7. iti kho bhikkhave desitam vo mayā purāṇam kammam desitam navam kammam, desito kammanirodho, desitā kammanirodhagāminī paṭipadā. yam vo bhikkhave, satthārā karaṇīyam sāvakānam hitesinā anukampakena anukampam upādāya, katam vo tam mayā². etāni bhikkhave rukkhamūlāni, etāni suññāgārāni, jhāyatha bhikkhave, mā pamādattha, mā pacchā vippaṭisārino ahuvattha, ayam vo amhākam anusāsanīti.

²katam kho mayā - syā.